

Cu temanan clave y talentonan grandi

Minister Hooyboer-Winklaar: Voz-i-Landia ta presenta e futuro di musica y cantamento na Aruba

ORANJESTAD - Diadomingo Aruba a conoce un era nobo pa Voz-i-Landia, un festival di composicion, areglo y cantamento, cual pa hopi aña no a wordo organisa, pero a haya bida atrobe cu algun miembro nobo den e comision organisa. E pre-final pa klasnan 1, 2 y 3 a tuma luga den un Cas di Cultura completamente "sold out" y ya ta conoci cu pa e pre-final pa klasnan 4, 5 y 6, cual ta tuma luga dia 5 di Mei no tin ticket mas tampoco.

Minister Michelle Hooyboer-Winklaar a expresa cu emocion den su stem diadomingo atardi cu un pa un tur e cantantenan hoben a causa un impresion inolvidabel cerca dje. "Mi no tin palabra pa expresa e sentimentonan,"



Minister Hooyboer-Winklaar a bisa, añadiendo cu el a haya kippevel ora el a tende e inspiracionnan tocante temanan clave y e gran talento di e muchanan. Esaki ta comienso di algo grandi, si considera tur e talentonan cu a sali di Voz-i-Landia...e muchanan aki ta e futuro di musica y canto aki

na Aruba, e mandatario a comenta. El a bisa cu e entre nan tin talentonan cu lo supera tur cos na Aruba y por yega na nivelnan internacional. Minister Michelle Hooyboer-Winklaar a subraya cu e talento demostra a surpasa tur expectativa y cu el a sinti un orguyo grandi di por a presen-

cia tanto talento y uzo bunita di e idioma Papiamentu.

Pa medio di organisacionnan manera FDEC y Departamento di Cultura, e mandatario a bisa cu e ta apoya Voz-i-Landia 100 por ciento y e ta felicita tur esunnan cu a uni pa trece e festival aki bek cu tanto pasion.

"Mi ta hopi contento di por a comparti den esaki," Minister Hooyboer-Winklaar a bisa, enfatisando e rol di comunicacion cu e festival ta representa. E musica ta duna un canal di expresa e pensamentonan di e muchanan, asina nan ta expresa kico ta pasa den nan bida diariamente y kico ta e cosnan cu e muchanan kier pa e comunidad ta consciente di dje, por ehempel temanan manera bullying, amor pa

mama, "mi culpa", y mas, Minister Michelle Hooyboer-Winklaar a expresa. "Tur e temanan ta mensahenan hopi clave pa nos como adulto scucha!" Co-organisa di Voz-i-Landia Adoncito Croes, kende ta maestro di geografia na Filomena College MAVO y Middag MAVO a bisa di ta contento di por yuda brinda nos futuro artistanan un chens pa presenta riba un escenario asina bunita pa nan expresa nan mes. E temanan bunita a "touch" tur hende, segun Croes.

E prome festival Voz-i-Landia, cual a tuma luga na 1982, a wordo gana pa e cantica skirbi pa Don Ramon Krozendijk, "Cunucu di Zuid", cual a bira un di e canticanan clasico na Papiamentu. □